

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O DOPUNI ZAKONA O KOMISIJI ZA VRIJEDNOSNE PAPIRE**

Sarajevo, august 2013. godine

PRIJEDLOG ZA DONOŠENJE ZAKONA PO HITNOM POSTUPKU

U skladu sa članom 191. Poslovnika o radu Predstavničkog doma („Službene novine Federacije BiH“, br. 69/07 i 2/08) i članom 186. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09) predlažemo da se Zakon o dopuni zakona o Komisiji za vrijednosne papire donese po hitnom postupku

Donošenje ovog Zakona je potrebno da bi se nastavilo neometano funkcioniranje finansijskog tržišta u Federaciji BiH.

ZAKON

O DOPUNI ZAKONA O KOMISIJI ZA VRIJEDNOSNE PAPIRE

Član 1.

U Zakonu o Komisiji za vrijednosne papire ("Službene novine Federacije BiH", br. 39/98, 36/99 i 33/04) u članu 5. dodaje se novi stav 6. koji glasi:

"Predsjednik, zamjenik predsjednika i članovi Komisije nastaviće da obavljaju svoje dužnosti do momenta kada se u skladu sa stavom 1. ovog člana imenuju osobe koje će ih zamijeniti."

Član 2.

Ovaj Zakon stupa na snagu narednog dana od dana objavljivanja u „Službenim novinama Federacije BiH“.

O b r a z l o ž e n j e:

I. USTAVNI OSNOV

Ustavni osnov za donošenje Zakona o dopuni Zakona o Komisiji za vrijednosne papire je u članu III. 1. tačka c. koji je izmijenjen amandmanima VIII, LXXXIX i CVI i članu IV. A 20. (1) d) Ustava Federacije Bosne i Hercegovine, prema kojima je u isključivoj nadležnosti Federacije Bosne i Hercegovine donošenje propisa o finansijama, a Parlament Federacije BiH uz ostala ovlaštenja predviđena Ustavom, odgovoran je za donošenje zakona o vršenju dužnosti u federalnoj vlasti.

II. RAZLOZI ZA DONOŠENJE ZAKONA

Komisija je samostalna specijalizirana institucija koja za svoj rad odgovara Parlamentu Federacije BiH, a koju čine predsjednik, zamjenik predsjednika i tri člana, koje imenuje i razrješava Predsjednik Federacije BiH uz saglasnost potpredsjednika Federacije BiH i potvrđuje Parlament Federacije BiH. Kako je trenutno istekao mandat, a nije izvršeno novo imenovanje, potrebno je da se nastavi sa vršenjem dužnosti postojećih članova, jer se time omogućava funkcionisanje finansijskog tržišta. Ako Komisija ne funkcioniše to bi značilo da se u Federaciji BiH ne može osnovati niti jedno dioničko društvo, jer prema Zakonu o privrednim društvima se ne mogu upisati u sudski registar dok ne budu upisani u registar emitenata rješenjem Komisije, niti se mogu emitovati vrijednosni papiri prema Zakonu o tržištu vrijednosnih papira, niti se mogu osnivati i dobiti dozvolu učesnici na tržištu vrijednosnih papira (brokerska društva, skrbnici i dr.) po tom istom zakonu, niti se mogu osnivati i dobiti dozvolu društva za upravljanje investicijskim fondovima prema Zakonu o investicijskim fondovima, niti mali dioničari imaju zaštitu kod preuzimanja dioničkih društava prema Zakonu o preuzimanju dioničkih društava. U slučajevima da Komisija ne donese niti jedno rješenje koje se tiče upisa u registar emitenata, dovedeno bi bilo u pitanje rad svih dioničkih društava u Federaciji BiH, a to bi moglo imati nesagledive posljedice za tržište kapitala u Federaciji BiH i općenito stanje privrede u Federaciji BiH, a što u konačnici može da dovede do onemogućavanja rada svim dioničkim društvima u Federaciji BiH, jer bez rješenja Komisije ne mogu povećati osnovni kapital, smanjiti kapital, emitovati dionice, izvršiti upis uprave u sudski registar, izvršiti statusne promjene (spajanje, pripajanje, podjelu i promjenu oblika organizovanja dioničkog društva), kao i da Komisija vrši nadzor: rada brokerskih društava, berze, društava za upravljanje fondovima i trgovanje putem berze

III. USKLAĐENOST SA EVROPSKIM DIREKTIVAMA

Ne vrši se usklađivanje.

IV. OBRAZLOŽENJE POJEDINIH ODREDBI

Članom 1. se predviđa da vršenje dužnosti predsjednika, zamjenika predsjednika i članova Komisije se nastavlja do imenovanja novih.

Članom 2. predviđa se stupanje na snagu ovog Zakona.

V. FINANSIJSKA SREDSTVA

Za donošenje ovog zakona nisu potrebna dodatna finansijska sredstva.

ZAKON O KOMISIJI ZA VRIJEDNOSNE PAPIRE
Tekst odredbi koje se dopunjuju
(„Službene novine Federacije BiH“, br. 39/98, 36/99 i 33/04)

Član 5.

Komisiju čine predsjednik, zamjenik predsjednika i tri člana, koje imenuje i razrješava predsjednik Federacije uz suglasnost potpredsjednika Federacije i potvrđuje Parlament Federacije.

Mandat Komisije traje pet godina.

Isto lice može biti više puta imenovano u sastav Komisije.

Prilikom imenovanja Komisije za svaki naredni mandat, imenuju se najmanje dva člana iz sastava Komisije iz prethodnog mandata.

Predsjednik, zamjenik predsjednika i članovi Komisije moraju imati visoku školsku spremu ekonomske ili pravne struke i višegodisnje odgovarajuće profesionalno iskustvo.